



東坡先生尺牘六卷目錄

張嘉父六首

陳季常十六首

毛澤民七首

何正通三首

陳傳道六首

李方叔十九首

劉壯輿六首

潘彥明十首

龐安常三首

王元直二首

王文甫二首

目錄終

東坡先生尺牘六卷

瑯琊焦竑批點

江夏黃居中訂正
仁和張堯翼同閱

與張嘉父

某啓都下紛紛不遂款奉別來思渴深矣比日
起居何如某凡百粗遣汝陰僻陋但一味閑真
衰病所樂也合會未期千萬保重不宣

二

某啓今日與嘉父道別浩然笑僕醉後草書雖
不通他心信手亂書亦有禍福也公少年高才
不患不達但志於存養孟子所謂心勿忘勿助

東坡二刻 卷六
長者此當銘之坐右世人學道非助長也則忘
而已矣僕少時曾作雜說一首送叔毅其首云
曷嘗觀於富人之稼者是也願一閱之承過聽
見語甚重不敢不盡

三

某啓君爲獄吏人命至重願深加意大寒大暑
囚人求死不獲及病者多爲吏卒所不視有非
病而致死者僕爲郡守未嘗不躬親接視若能
留意於此遠到之福也

四

某啓君年少氣盛但願積學不憂無人知譬如
農夫是蔗是菘雖有饑饉必有豐年敢以爲贈
此外萬萬自愛

某啓公文章自己得之於心應之於手矣譬之
百貨自有定價豈小子區區所能貴賤哉潛雖
伏矣亦孔之昭足下雖欲不聞於人不可得願
自信不疑而已

五

某啓借示賦論諸文遂得厭觀殊發老思西漢
一首尤精確文帝不誅七國世未有知其說者

公文
人留
心吏
治如
此

東坡二女 卷六
獨張安道嘗言之於神考其疏人亦莫之見也。今公所論若合符節，非學識至到不能及此。仰欽仰欽。

六

惠州

某啓久不奉書，過辱不遺遠枉教尺，且審起居佳勝，感慰交集。著述想日益富，示諭治春秋學。此儒者本務，又何疑焉。然此書自有妙用，學者罕能領會。若求之繩約中，乃近法家者流，苛細繳繞，竟亦何用。雖丘明識其妙用，然不肯盡談。微見端倪，兆欲使學者自得之。故僕以爲難，未敢輕論也。凡人爲文，至老多有所悔。僕嘗悔其少作矣。若著成一家之言，則不容有所悔。當且博觀而約取，如富人之築大第，儲其材用，既足而後成之。然後爲得也。愚意如此，不知是否。夜寒筆凍，眠昏不罪，不罪。春首惟千萬自重，不宜。

與陳季常

黃州

某啓昨日人還拜書，想已達。今日見馬鋪報公擇二十一日入光州界，計今已在光。輒於太守處借人持書約會於岐亭。某次用初一日早離州。初二日晚必造門，此會殆爲希有。然第一請

東坡二如 卷六
公勿殺物命更與公擇一簡邀之尤妙人速不
盡所懷恕之不宜

某啓辱示詩益深感歎殊未暇和荅積壓債負
不遑也人還復謝不宜

二 黃州

早來宿酒殊昏倦得佳篇一洗幸甚昨日醉中
口占忘之矣寫一首爲笑

三 黃州

近因往螺師店看田旣至境上潘尉與龐醫來
相會因視臂腫云非風氣乃藥石毒也非鍼去
之恐作瘡乃已遂相率往麻橋龐家住數日鍼
療尋如其言得愈矣歸家領所惠書及藥併荷
憂愛之深至仍審比來起居佳安曾青老翁須
傳燈錄皆已領一一感佩五代史亦收得所看
田乃不甚佳且罷之蘄水溪山乃爾秀邃耶龐
醫熟接之乃奇士知新屋近撰本草爾雅謂一物而
多名也見劉頌具說深欲走觀近得公擇書云四
月中乃到此想季常未遽北行當與之偕往耳
非久太守處借人遣齋家傳去別細奉書

四 黃州

柴炭已領感忤感忤東坡昨日立木殊耽耽也

五 黃州

王家人力來及專人并獲二緘及承雄篇贊詠
異夢證成仙果甚喜幸也某雖竊食靈芝而君
為國鑄造藥力縱在君前陰功必在君後也呵
呵但累書聽流言以誣平人不得無折損也懸
弧之日請一書示諭當作賀詩切祝切祝比日
起居佳否何日決可一游郡城企望日深矣臨
舉雖有一室可憇從者但西日可畏承天極相
近或門前一大舸亦可居到後相度未聞萬萬
以時自重

六 黃州

欲借易家文字及史記索隱正義如許告季常
為帶來季常未嘗為王公屈今乃特欲為我入
州州中士大夫聞之聳然使不肖增重矣不知
果能命駕否春甕但不惜不須更為遺恨也

七 黃州

鄭巡檢到領手誨具審到家尊履康勝羈孤結
戀之懷至今未平也數日前率然與道源過江
遊寒溪西山奇勝殆過於所聞獨以坐無狂先

索隱正義亦取之與用修合

東坡二文 卷六 五
生爲深憾耳呵呵示諭武昌田曲盡利害非老
成人吾豈得聞此送還人諸物已領易義須更
半年功夫練之乃可出想秋末相見必得拜呈
也近得李長吉二詩錄去幸秘之目疾必已差
茂木清陰自可愈此餘惟萬萬順時自重

八

黃州

示諭武昌一策不勞營爲坐減半費此真上策
也然某所慮又恐好事君子更加粉飾云擅去
安置所而居於別路傳聞京師非細事也雖復
往來無常然多言者何所不至若大霈之後恩

旨稍寬或可圖此更希爲深慮之仍且密之爲
上

九

黃州

稍不奉書渴仰殊深辱書承起居佳勝新居漸
畢工甚慰想望數日得君字韻詩茫然不知醉
中拜書道何等語也老媳婦云一絕乞秀英君
大爲愧悚真所謂醉時是醒時語也蒙不深罪
甚幸雖知來篇非實語猶且收執庶幾萬一莫
更要寫眷記否呵呵柳簿云某奉訝者不知得
之於誰安有此理來書雄冠之語亦無人見但

有荅柳二書云陳季常要寫春記欲與寫云文武案察常居祿位亦如與季常書作戲耳何名爲訝哉想公必不以介意不荅最妙日夜望季常入州但可惜公擇將至若不爭數日而吾三人者不一相聚劇飲數日爲可惜耳有人往舒五七日必回可見其的若不來續以書布聞茶日更留作樣幾日近日新闕甚多篇篇皆奇遲公來此口以傳授餘惟萬萬自愛

十 黃州

疊辱來貺且喜尊體已全康復然不受盡言遂

欲聞公何也公養生之效歲有成績今又示病彌月雖使臯陶聽之未易平反公之養生正如小子之圓覺可謂害腳法師鸚鵡禪五通氣球黃門妾也至禱

十一 黃州

孫巨源之姪甚佳士兼甚仰盛德云常去請見某告以季常不蓄烏巾十餘年矣又不欲便裹帽奉謁他必自去見公也鎮中得一好官人亦非細事叔亶書已附去西方多事此君却了得莫遂奮起否見報趙二罷相州取勘他稱病乞

不下獄不知爲何事私甚憂之公聞其詳否又報舒直乞郡閑知之

十二

黃州

疾馬鋪行奉書未達間領來誨具審起居住勝至慰至慰答京洛書過當過當此何足稱先生篤於風義至自割瘦脰以啖我可謂至矣然以化不爲鷺鷥者則恐未能也彼不相知者視僕之饑飽如觀越人之肥瘠耳雖象未易化也鄉諺有云缺口鑷子者公識之乎想當拊掌絕倒知過節入州甚幸未間萬萬自重

缺口鑷子者取一毛不拔

恐未嘗聞故及之

十三

黃州

別後凡四辱書一一領厚意具審起居住勝爲慰又惠新詞句句警拔詩人之雄非小詞也但豪放太過恐造物者不容人如此快活一枕無礙睡輒亦得之耳公無多奈我何呵呵所要謝章寄去聞車馬早晚北來恐此書到日已在道矣故不覩縷

十四

黃州

置中疊辱手示并惠果羞感愧增劇酒隱堂詩

東坡二效 卷六
當塗中抒思不敢草草作公是大檀越豈容復
換牌也一笑

十五

翰林

某局事雖清簡而京輦之下豈有閒人不覺劫
劫過日勞而無補顏髮蒼然見必笑也子由同
省日夕相對此爲厚幸公小疾雖平不可忽善
言不離口善藥不離手此乃古人之要言可書
之座右也藥物有彼中難得須此幹置者千萬
不外如聞公有意入京不知幾時可來如得一
會何幸如之柳一已在此一訪值出未見也儼
居在蒲池寺去此稍遠數日頗有新事左揆已
出陳州君實代之蹇老知和州授之廬簽餘不
能盡報去劉莘老中丞旦夕授也黃安中龍直
越州靜菴不管閑事最妙最妙

十六

惠州

軾啓惠兵還辱得季常手書累幅審知近日尊
候安勝擇括等三鳳毛皆安爲學日益喜慰無
量軾罪大責薄聖恩不貲知幸念咎之外了無
綠髮挂心置之不足復道也自當塗聞命便遣
骨肉還陽羨獨與幼子過及老雲并二老婢共

吾過嶺到惠將半年風土食物不惡吏民相待甚厚孔子云雖蠻貊之邦行矣豈欺我哉自數年來頗知內外丹要處冒昧厚祿負荷重寄決無成理自失官後便覺三山跬步雲漢咫尺此未易遽言也所以云云者欲季常安心家居勿輕出入老劣不煩過慮決須幅巾草履相從於林下也亦莫遣人來彼此鬚髯如戟莫作兒女態也在定日作松醪賦一首今寫寄擇等庶以發後生妙思着鞭一躍當撞破烟樓也長子邁作吏頗有父風二子作詩騷殊勝咄咄皆有跨

竈之興想季常讀此捧腹絕倒也今日遊白水佛跡山山上布水懸三十仞雷轟電散未易名狀大略如項羽破章邯時也自山中歸得來書燈下裁荅信筆而書紙盡乃已託郡中作皮筒送去想黃人見軾書必不沉墜也子由在筠極安處此者與軾無異也書云老軀極健度去死遠在讀之三復喜可知也吾儕但斷却少年時無狀一事誠是然他未及子由近見人說顏狀如四十歲人信此事不辜負人也不宜軾再拜

荅毛澤民

翰林

軾啓比日酷暑不審起居何如頃承示長牋及詩文一軸日欲裁謝因循至今悚息今時爲文者至多可喜者亦衆然求如足下閑暇自得清美可口者實少也敬佩厚賜不敢獨饗當出之知者世間唯名實不可欺文章如金玉各有定價先後進相汲引因其言以信於世則有之矣至其品目高下益付之衆口決非一夫所能抑揚軾於黃魯直張文潛輩數子特先識之耳始誦其文益疑信者相半久乃自定翕然稱之軾豈能爲之輕重哉非獨軾如此雖向之前輩亦不過如此也而况外物之進退此在造物者非軾事辱見貺之重不敢不盡承不久出都尚得一見否

二

翰林

再辱賜手教伏審酷熱起居清勝見諭某何敢當徐思之當不爾非足下相期之遠某安得聞此言感愧深矣體中微不佳奉荅草草

三

惠州

某啓公素人來得書累幅旣聞起居之詳又獲新詩一篇及公素寄示雙石堂記居夷久矣不

東坡二 亥 卷六
意復聞韶濩之餘音喜慰之極無以云論久廢
筆硯不敢繼和必識此意會合無期臨書惘惘
秋暑萬萬以時自重不宣

四

惠州

某寓居粗遣本帶一幼子來今者長子又授韶
州仁化令冬中當挈家來至此某又已買得數
畝地在白鶴峰上古白鶴觀基也已令斫木陶
瓦作屋二十間今冬成去七十無幾矧未能必
至耶更欲何之以此神氣粗定無足爲故人念
者聖主方設科求宏詞儻有意乎

五

惠州

新居在大江上風雲百變足娛老人也有一書
齋名思無邪齋閑知之

六

惠州

某啓寄示奇茗極精而豐南來未始得也亦時
復有山僧逸民可與同賞此外但緘而去之爾
佩荷厚意永以爲好

七

惠州

秋興之作追配騷人矣不肖何足以窺其粗遇
不遇固自有定數向非厄窮無聊何以發此奇

東坡二文 卷六
思以自表於世耶敬佩來貺傳之知音感愧之
極數日適苦壅嗽殆不可堪強作報滅裂死罪
死罪

與何正通

某啓辱書承起居住佳勝鄉校淹留然使徐之士
子識文章瑰偉之氣非小補也某又復西上紛
紛無補甚媿朋友矣乍冷萬萬以時自重不宣

二

某啓張聖途來稍聞動止爲慰退之所歎乃今
見之大匠旁觀愧汗深矣行役忽忽不盡區區

三

某啓忝命假守出於獎庇禮當詣謝以衰病疲
曳不給於力愧悚而已乍熱起居住佳勝登舟迫
遽不果造謝益增仰戀尚冀順時爲國自厚謹
奉啓不宣

答陳傳道

黃州

軾頓首再拜錢塘主簿陳君足下曩在徐州得
一再見及見顏長道輩皆言足下文詞卓犖志
節高亮固欲朝夕相從適會訟訴偶有相關及
者遂不復往來此自足下門中不幸亦豈爲吏

者所樂哉想彼此有以相照已而軾又負罪遠竄流離契濶益不復相聞今者蒙書教累幅相屬之厚又甚於昔者知足下釋然果不以前事介意幸甚幸甚自得罪後雖平生厚善有不敢通問者足下獨犯衆人之所忌何哉及讀所惠詩文不數篇輒拊掌太息此自世間奇男子豈可以世俗趣舍量其心乎詩文皆奇麗所寄不齊而皆歸合於大道軾又何言者其間十常有四五見及或及舍弟何相愛之深也處世齟齬每深自嫌惡不論他人及見足下輩猶如此輒

亦少自赦詩能窮人所從來尚矣而於軾特甚今足下獨不信建言詩不能窮人爲之益力其詩日已工其窮殆不可量然亦在所用而已不龜手之藥或以封安知足下不以此達乎人生如朝露意所樂則爲之何暇計議窮達云能窮人者固繆云不能窮人者亦未免有意於畏窮也江淮間人好食河豚每與人爭河豚本不殺人嘗戲之性命自子有美則食之何與我事今復以此戲足下想復千里爲我一笑也先吏部詩幸得一觀輒題數字繼諸公之末見爲編述

東坡二刻 卷六 十四
超然黃樓二集爲賜尤重從來不曾編次縱有
一二在者得罪日皆爲家人婦女輩焚毀盡矣
不知今乃在足下處當爲刪去其不合道理者
乃可存耳軾於錢塘人有何恩意而其人至今
見念軾亦一歲率常四五夢至西湖上此殆世
俗所謂前緣者在杭州嘗遊壽星院入門便悟
曾到能言其院後堂殿山石處故詩中嘗有前
生已到之語足下主簿於法得出入當復縱游
如軾在彼時也山水窮絕處往往有軾題字想
復題其後足下所至詩但不擇古律以日月次

之異日觀之便是行記有便以一二見寄慰此
惘惘其餘慎疾自重不宜軾頓首再拜

二 杭州

某啓久不接奉思仰不可言辱專人以書爲貺
禮意兼重捧領惕然且審比來起居佳勝少慰
馳想某以衰病難於供職故堅乞一閑郡不謂
更得煩劇然已得請不敢更有所擇但有廢曠
不治之憂爾而來書乃有遇不遇之說甚非所
以安全不肖也某凡百無取入爲侍從出爲方
面此而不遇復以何者爲遇乎舟中倦暑無聊

東坡二刻 卷六 十五
來使立告迴區區百不盡一乍遠唯千萬自愛
不宣

三

揚州

某啓衰朽何所取而傳道昆仲過聽相厚如此
數日前履常謁告自徐來宋相別王八子安偕
來方同舟東下至宿而歸又承傳道亦欲至靈
璧以部役沂上不果佩荷此意何時可忘又承
以近詩一冊爲賜筆老而思深蘄配古人非求
合於世俗者也幸甚幸甚錢塘詩皆縱筆一一
煩收錄祇以暴其短爾某方病市人逐於利好
某拙文欲毀其板敢令刊耶當俟稍暇盡取舊
詩文存其不甚惡者爲一集以公過取其言當
令人錄一本奉寄今所示者不唯有脫悞其間
亦有他人文也

四

揚州

某啓知日課一詩甚善此技雖高才非甚習不
能工也聖俞昔常如此某近絕不作詩蓋有以
非面其究頃作神道碑墓誌數篇碑蓋被旨作
而誌文以景仁丈世契不得辭欲寫呈又未有
暇聞都下已開板想卽見之也某頃伴虜使頗

能誦某文字以知虜中皆有中原文字故爲此
碑謂富公碑也欲使虜知通好用兵利害之所在也

昔年在南京亦嘗言此事故終之開一作刊

五

李六丈文集引得閑當作向所示集古文留子
由處有書令檢送也

六

北歸

某啓久不上問愧負深矣忽枉手訊勞來勤甚
夙昔之好不替有加兼審比來起居佳勝感慰
兼集諸新舊詩幸得敬覽不意餘生復見斯作

古人日遠俗學衰陋作者風氣猶存君家伯仲
間見近報履常作正字伯仲介持之操處窮益
勵時流孰知之者用是占之知公議少伸也耶
傳道豈久淹筦庫者未由面談惟冀厚自愛重
而已

來詩欲和數首以速發此介故未暇閑居亦有
少述作何日得見昆仲稍出之也宮觀之命已
過忝矣此外只有歸田爲急承見教想識此懷
履常未及拜書因家訊道區區

答李方叔

黃州

某啓久不奉問爲愧適中辱手書勞慰益厚無
狀何以致足下拳拳之不忘如此比日起居何
如今歲暑毒十倍常年雨晝夜不止者十餘日
門外水天相接今雖已晴下潦上蒸病夫氣息
而已想足下閉門著述自有樂事間從諸英唱
和談論此又可羨也何時得會合惟萬萬自重
不宜

二

黃州

軾頓首先輩李君足下別後適中得二書皆未
果答專人來又辱長箋且審比日孝履無恙感

慰深矣惠示古賦近詩詞氣卓越意趣不凡甚
可喜也但微傷冗後當稍收斂之今未可也足
下之文正如川之方增當極其所至霜降水落
自見涯涘然不可不知也錄示孫之翰唐論僕
不識之翰今見此書凜然得其爲人至論褚遂
良不諧劉洎太子瑛之廢緣張說張巡之敗緣
房瑄李光弼不當圖史思明宣宗有小善而無
人君大略皆舊史所不及議論英發暗與人意
合者甚多又讀歐陽文忠公志文司馬君實跋
尾益復慨然足下欲僕別書此文入石以爲

東坡二卷六
之翰不朽之託何也之翰所立於世者雖無歐陽公之文可也而况欲託字畫之工以求信於後世不以陋乎足下相待甚厚而見譽過當非所以爲厚也近日士大夫皆有僭侈無涯之心動輒欲人以周孔譽已自孟軻以下者皆憮然不滿也此風殆不可長又僕細思所以得患禍者皆由名過其實造物者所不能堪與無功而受千鍾者其罪均也深不願人造作言語相粉飾以益其疾足下所與遊者元聿讀其詩知其爲超然奇逸人也緣足下以得元君爲賜大矣

唐論文字不少過煩諸君寫錄又以見足下所與游者皆好學喜事甚善甚善獨所謂未得名世之士爲志文則未葬者恐於禮未安司徒文子問於子思喪服旣除然後葬其服何服子思曰三年之喪未葬服不變除何有焉昔晉溫嶠以未葬不得調古之君子有故不得已而未葬則服不變官不調今足下未葬豈有不得已之事乎他日有名世者旣葬而表其墓何患焉辱見厚不敢不盡冬寒惟節哀自重

三

黃州

東坡二刻 卷六
秋試時不審已從吉未若可以下文字須望鼎
甲之捷也暑中既不飲酒無緣作字時有一二
輒爲人取去無以塞好事之意亦不願足下如
此癖好也近獲一銅鏡如漆色光明冷徹背有
銘云漢有善銅出白陽取爲鏡清如明左龍右
虎備之字體雜篆隸真漢時字也白陽不知所
在豈南陽白水陽乎如字應作而字使耳在龍
右虎皆未甚曉更閑爲考之

四

黃州

姪壻王適子立近過此在彭城取解或場屋相

見其人可與講論詞學德性皆過人也其弟名
適字子敏亦不甚相遠承問及兒子屬令幹事
未及奉書王文甫已與簡令持前所留奉納矣

五

黃州

某啓辱書累數百言反覆尋味詞氣甚偉雖不
肖亦以粗識君子志義所在然僕以愚不聞過
故至黜辱如此若猶哀憐之當痛加責讓以感
勵其意庶幾改往修來以盡餘年今乃粉飾刻
畫是益其疾也愧悚愧悚承持制甚苦哀慕良
深便欲走詣而自謫官以來不復與往還慶吊

東坡二刻 卷六 三十一
杜門省愆而已謹遣小兒問左右當以亮察不
宣

六 翰林

某啓承示新文如子駿行狀丰容雋壯甚可貴
也有文如此何憂不達相知之久當與朋友共
之至於富貴則有命矣非綿力所能必致姑務
安貧守道使志業益克自當有獲鄙言拙直久
乃信爾照察幸甚

七 潁州

某啓久別音問缺然忽承惠教愧仰何勝秋暑
未過起居何如未由會見萬萬順時珍重忽忽
上謝不宣

八 翰林

某啓專人辱啓事長書及手簡累幅意貺甚厚
非所敢當又蒙教以不逮非君子直亮期人之
遠何以及此然衰病之餘豈任此責愧悚之極
比日起居住佳勝惠示狨皮等物皆所不敢當禮
曹之傳益妄也信菴元不發却付來人蓋近日
親知所寄惠一切辭之非獨於左右也千萬恕
察知非久入京見訪幸甚未間千萬珍重不宣

某啓疊辱手教愧荷不已雪寒起居住佳勝示諭固識孝心深切然某從來不獨不書不作銘誌但緣子孫欲追述祖考而作者皆未嘗措手也近日與溫公作行狀書墓誌者獨以公嘗爲先妣墓誌不可不報爾其他決不爲所辭者多矣不可獨應命想必得罪左右然公度某無他意意盡於此矣悚息悚息

十 翰林

某再啓承遂舉十喪哀勞極矣此古人之事復見於君恨不能兼助爾不易不易旣與墓志異名而同實固難如教不罪不罪某暮歸困甚來人又立行不復覩縷悚息悚息

十一 翰林

某啓昨日辱書不卽荅爲愧乍晴孝履安穩所示反復思之亦欲有以少慰孝子之心而某所不敢作者非獨銘誌而已至於詩賦贊詠之類但涉文字者舉不敢下筆也憂患之餘畏怯彌甚必望有以亮之少選更令兒子去面述不一

十二 翰林

前日所貺高文極為奇麗但過相粉飾深非所望殆是益其病爾無由往謝悚汗不已

十三 翰林

某啓近者雖獲屢見迫於多故不盡區區別來辱書且喜體中佳勝某方杜門請郡章四上未允方更請爾會見未可期惟千萬順時自愛不宣

十四 翰林

某以虛名過實士大夫不察責望逾涯朽鈍不能副其求復致紛紛欲自致省靜寡過之地以餞餘年不知果得此願否故人見愛以德不應更虛華粉飾以重其不幸承示諭但有愧汗爾

十五 翰林

某啓前日辱訪客衆不及款話兩三日又無緣接舉思念不可言手教為貺慙感無量苦寒諸况如何常日不獨以禁令不得瞻奉又以差館伴紛紛殊不暇也衰病疲曳脫去不可可勝歎耶人還不一

十六 翰林

東坡二 卷六
某啓連日殿門祇候不果致問辱簡承起居住
勝來日行香罷又須一吊康公乃歸方叔能枉
訪夜話爲別甚幸餘留面盡

十七

翰林

軾頓首方叔先輩足下屢獲來教因循不一裁
答悚息不已比日履茲秋暑起居住勝錄示子
駿行狀及數詩辭意整暇有加於前得之極喜
慰累書見責以不相薦引讀之甚愧然其說不
可不盡君子之知人務相勉於道不務相引於
利也足下之文過人處不少如李氏墓表及子

駿行狀之類筆勢翩翩有可以追古作者之道
至若前所示兵鑑則讀之終篇莫知所謂意者
足下未甚有得於中而張其外者不然則老病
昏惑不識其趣也以此私意猶冀足下積學不
倦落其華而成其實深願足下爲禮義君子不
願足下豐於才而廉於德也若進退之際不甚
慎靜則於定命不能有毫髮增益而於道德有
丘山之損矣古之君子貴賤相因先後相援固
多矣軾非敢廢此道平生相知心所謂賢者則
於稠人中譽之或因其言以考其實實至則名

東坡二刻 卷六 三十四
隨之名不可掩其自爲世用理勢固然非力致也陳履常居都下逾年未嘗一至貴人之門章子厚欲一見終不可得中丞傅欽之侍郎孫莘老薦之軾亦挂名其間會朝廷多知履常者故得一官軾孤立言輕未嘗獨薦人也爵祿砥世人主所專宰相猶不敢必而欲責於軾可乎東漢處士私相謚非古也殆似丘明爲素臣當得罪於孔門矣孟生貞曜益亦蹈襲流弊不足法而况近相名字乎甚不願足下此等也軾於足下非愛之深期之遠定不及此猶能察其意否

近秦少游有書來亦論足下近文益奇明主求人如不及豈有終汨沒之理足下但信道自守當不求自至若不深自重恐喪失所有言切而盡臨紙悚息未卽會見千萬保愛近夜眼昏不一不一軾頓首

十八

北歸

比年於稠人中驟得張秦黃晁及方叔履常輩意謂天不愛寶其獲益未艾也比來經涉世故間關四方更欲求其似邈不可得以此知人決不徒出不有益於今必有覺於後決不碌碌與

草木同腐也迨過皆不廢學可令叅侍几研

十九

北歸

某啓比辱手教邇來所履如何某自恨不以一身塞罪坐累朋友如方叔飄然一布衣亦幾不免純甫少游又安所獲罪於天遂斷棄其命言之何益付之清議而已憂患雖已過更宜掩口以安晚節也不訝不訝

與劉壯與

某啓久濶但有懷企竊惟起居佳勝便欲造門以器之率入山還當奉謁謹奉啓候問忽忽不

宣

二

某昨夜苦熱減衣晨起得頭痛病故不出見客然疾亦不甚也方令小兒研墨爲君寫數大字旋得來教及紙因盡付去恐墓表小字中亦有題目則額上恐不當復云墓表故別寫四大字以備或用也舍弟所作詞當續寫去人還忽忽

三

旦來枕上讀所借文篇釋然遂不知頭痛所在曹公所云信非虛語然陳琳豈能及君耶

東坡二女
四
北歸

某啓辱手教仍以茶筆爲旣契義之重理無可辭但北歸以來故人所餉皆辭之敬受茶一袋以拜意此陸宣公故事想不訝也仍寢來命幸甚

五
北歸

詩文二卷並納上後詩已別寫在卷後檢得舊本改定數字

六
北歸

某疾雖輕然頭痛畏風也承與李君同見過不果見不深訝否悚息悚息來日若無風當侵夜發去更不及走別一詩取笑

與潘彥明
離黃州

別來思念不去心遠想起居住安眷愛各無恙不見黃榜未敢馳賀想必高捷也某兩曾奉書達否屢夢東坡笑語覺後惘然也已買得宜興一小莊且乞居彼遂爲常人矣公必已赴省試謾發此書不復覩縷惟千萬保愛

二
登州還朝

行役無定久不奉書至登州領所惠書承起居

東坡二刻 卷六
佳勝甚慰思企到郡席不暖復蒙詔追勉強奔走愧歎不已緬懷舊遊殆不勝情承太夫人尊候如昨昌言令兄亦蒙惠書冗甚未及荅且申意毅甫與宗公願各爲致區區餘萬萬自重

三

登州還朝

少事奉聞吳待制謫居於彼想不免牢落望諸君一往見之諸照管某向者流落非諸君相伴何以度日雪堂如要偃息且與打揲相伴使忘遷謫之意亦諸君風義也不罪不罪

四

登州還朝

辱書喜承起居住佳勝眷聚各佳某老病還朝不爲久計已乞郡矣何時扁舟還鄉一過舊樓泗亂故人旬日而去言之悵然大熱千萬保愛

五

登州還朝

久不聞問方增渴仰忽領手字方知丈丈傾逝聞之悲怛不可言比日追慕之餘孝履且支持否某衰病懷歸夢想江上又聞耆舊凋喪可勝悽惋未由往慰惟冀節哀自重以畢後事

六

登州還朝

東坡甚煩葺治乳媪墳亦蒙留意感戴不可言

東坡二妙 卷六
令子各計安寶兒想見頎然矣郭興宗舊疾必
全平愈酒坊果如意否韓氏園亭曾興葺乎若
果有亭榭佳者可以小圖示及當爲作名寫牌
然非華事者則不足名也張醫博計安勝一場
災患且喜無事風顛不少減否何親必安竹園
復增葺否以上諸人各爲再三申意僕暫出苟
祿耳終不久客塵間東坡不可令荒蕪終當作
主與諸君遊如昔日也願遍致此意

七

登州還朝

近附黃兵書必達比日孝履何如劉全父來頗
聞動止殊慰想念京塵袞袞無佳思緬懷昔遊
悵惘而已昌言及諸故人皆未及書必察其少
暇伸意伸意乍暄千萬節哀自重

八

杭州

久不奉書切惟起居住勝老拙凡百如舊出守
舊治頗得湖山之樂但歲災傷拯救勞弊無復
齊安放懷自得之娛也彥明與故人諸公頗見
念否何時會合臨紙惘惘新春萬萬自重

九

杭州

兩兒子新婦各爲老乳母任氏作燒化衣服幾

東坡二刻 卷六 三十九
件敢煩長者叮囑一幹人令剝買紙錢數束仍
厚鋪薪芻於墳前一酌而燒之勿觸動爲佳侍
眷念之深必不罪于免悚息悚息

十 潁州

辱書感慰無量比日起居何如別來不覺九年
衰病有加歸休何日往來紛紛徒有愧歎知東
坡甚葺治故人仍復往還其間否會合無期臨
紙悵惘

答龐安常

登州還朝

久不爲問思企日深過辱存記遠枉書教具聞
起居住佳勝感慰兼集惠示傷寒論真得古聖賢
救人之意豈獨爲傳世不朽之資益已義貫幽
明矣謹當爲作題首一篇寄去方苦多事故未
能便付去人然亦不久作也老倦甚矣秋初決
當求去未知何日會見臨書惘惘惟萬萬以時
自愛

二 登州還朝

人生浮脆何者爲可恃如君能著書傳後有幾
念此便當爲作數百字仍欲送杭州開板也知
之

端居靜念思五臟皆止一而腎獨有二蓋萬物之所終始生之所出死之所入也故太玄罔直蒙酋冥罔爲冬直爲春蒙爲夏酋爲秋冥復爲冬則此理也人之四肢九竅凡兩者皆水屬也兩腎兩足兩外腎兩手兩目兩鼻皆水之升降出入也手足外腎舊說罔與腎相表裏而鼻與目皆古未之言也豈亦有之而僕觀書少不見耶以理推之此兩者其液皆鹹非水而何僕以爲不得此理則內丹不成此又未易以筆墨究也古人作明目方皆先養腎水而以心火暖之以脾固之脾氣盛則水不下泄心氣下則水上行水不下泄而上行目安得不明哉孫思邈用磁石爲主而以朱砂神麴佐之豈此理也夫安常博極羣書而善窮物理當爲僕思之是否一報某書

與王元直

黃州

黃州真在井底杳不聞鄉國信息不審比日起居何如郎娘各安否此中凡百粗遣江邊弄水挑菜便過一日每見一邸報須數人下獄得罪

東坡二集 卷六
方朝廷綜核名實雖才者猶不堪其任况僕頑
鈍如此其廢棄固宜但猶有少望或聖恩許歸
田里得款段一僕與子衆丈楊宗文之流往來
瑞草橋夜還何村與君對坐莊門喫瓜子炒豆
不知當復有此日否存道奄忽使我至今酸辛
其家亦安在人還詳示數字餘惟萬萬保愛

二 杭州

別久思詠春深不審起居佳否眷愛各康勝某
與二十七娘甚安小添寄叔並無恙新珠必甚
長成諸親各安旅宦寡悵思歸未由豈勝恨恨

某爲權倖所疾久矣然捃撫無獲徒勞掀攪取
笑四方耳不煩遠憂未緣會聚惟冀以時珍衛

與王文甫

黃州

數日不審尊候何如前蒙恩量移汝州比欲乞
依舊黃州住細思罪大責輕君恩至厚不敢不
奔赴數日念之行計決矣見已射得一舟不出
此月下旬起發沿流入淮泝汴至雍丘陳留間
出陸至汝勞費百端勢不得已本意終老江湖
與公扁舟往來而事與心違何勝慨歎計公聞
之亦凄然也甚有事欲面話治行殊未集冗迫

東坡二效 卷六
之甚公能兩三日間特一見訪乎至望至望元
粥藥并書乞便與送達三五日間買得瓷器更
煩差人得否

二 登州還朝

多時不奉書思仰不去心比日履茲酷暑體中
佳勝數日以伏暑下府初安乏力而潘二丈速
行略奉此數字殊不盡意西山詩一冊當今能
文之士多在其間并拙詩親寫與鄧聖求詩同
納上或能爲入石安溪亦佳不然寫放壁中可
也 尺牘六卷 終

東坡先生尺牘七卷目錄

程正輔七十二首

目錄 終

東坡先生尺牘七卷

瑯琊焦竑批點

鹽官翁彥登訂正
江夏黃居中全閱

與程正輔

俱惠州

某啓近聞使旆少留番禺方欲上問候長官來
伏承傳誨意指甚厚感忤深矣比日履茲新春
起居佳勝知車騎不久東按儻獲一見慰幸可
量未間伏冀萬萬以時自重謹奉手啓不宣

二

某再啓竄逐海上渴况可知聞老兄來頗有佳
思昔人以三十年爲一世今吾老兄弟不相從

四十二年矣念此令人悽斷不知兄果能爲弟
一來否然亦有少拜聞某獲譴至重自到此旬
日外便杜門自屏雖本郡守亦不往拜其辱良
以近臣得罪省躬念咎不得不爾老兄到此恐
亦不敢出迎若以骨肉之愛不責末禮而屈臨
之餘生之幸非所敢望也其餘區區殆非紙筆
所能盡惟千萬照悉而已

三

某啓專人至承賜教累幅感慰兼極比日履茲
春陽尊體佳勝知春夏間方按行此邦豈勝繫
望韶州風物甚美園亭德孺所治殊可喜但不
知有可與爲樂者否未披奉聞更冀若時保練
不宣

四

某啓老兄近日酒量如何弟終日把盞積計不
過五銀盞爾然近得一釀法絕奇色香味皆疑
於官法矣使旆來此有期當預醞也向在中山
創作松醪有一賦閣錄呈以發一笑也

五

某啓數日聞使旆來此喜慰不可言方欲遣人

奉狀遽捧手教感愧兼集比日涉履風濤起居
佳勝旦日瞻奉併陳區區人還手狀不宜

六

某深欲出迎郊外業已杜門知兄知愛之深必
不責此然愧悚甚矣專令小兒走舟次也知十
秀才待行喜得會見不及別奉書

七

某啓昨日辱臨款語傾盡感慰深矣經宿起居
佳勝所貺皆珍奇物意兩重敢不拜賜少頃面
謝人還不宜

八

某啓謫居窮寂誰復顧者兄不惜數舍之勞以
成十日之會惟此恩意如何可忘別後不免數
日牢落竊惟尊懷亦悵然也但癡望沛澤北歸
將復會見爾到廣少留否比日起居何如某到
家無恙不煩念及未叅候間萬萬若時自重不
宣

九

某啓兩甥相聚多日備見孝義之誠未暇別書
悉之兒子適令幹少事未及拜狀輒已和得白

水山詩錄呈爲咲并亂做得香積數句同附上
前本并納去

十

某啓近檢法行奉書未達間伏蒙賜教并寄惠
柑子此中雖有似此佳者卽不識也但十有一
二壞爾謹如教略嘗不多啖也比日還府以來
起居住勝某兒子如昨不煩念及大郎三郎有
近耗未歲暮無緣會合惟冀若時珍練區區不
宣

十一

某啓和示香積詩真得淵明體也某喜用陶韻
作詩前後益有四五十首不知老兄要錄何者
稍間編成一軸附上也只告不示人爾

十二

某啓忽復殘臘會合無緣不能無天末流離之
念也急足回辱書具審尊體康勝仍示佳句五
章字字新奇歎詠不已老嫂奄隔更此徂歲想
加悽斷然知無益惟日遠日忘爲得理也某近
苦痔殊無聊杜門謝客兀坐爾新春爲國自愛
蚤膺北歸殊寵不宣

十三

某覩近事已絕北歸之望然中甚安之未說妙
理達觀但譬如元是惠州秀才累舉不第有何
不可知之免憂詩屢和韻險又已更老手五賡
殆難措辭也亦苦痔無情思爾惠黃雀感愧感
愧子由一書告蚤入皮筒幸甚幸甚

十四

某啓殘臘只數日感念聚散不能無異鄉之歎
不審兄諸况如何子舍已到否新年不獲奉觴
惟祝蚤膺名命未間更乞爲時自重不宣

十五

某近以痔疾發歇不定亦頗無聊故未和近詩
也郡中急足有書并顧椽寄碑文達否成都寶
月一師孫法舟者遠來相看過筠帶子由一書
來他由循州行故不得面達今附上

十六

某啓人來辱書伏承履茲新春起居住佳勝至孝
通直已還左右感慰良深且聞有北轅之耗尤
副卑望詠史等詩絕高每篇乃是一論屈滯他
作絕句也前後惠詩皆未和非敢懶也蓋子由

東坡二刻 卷七 五
近有書深戒作詩其言切至云當焚硯棄筆不
但作而不出也不忍違其憂愛之意故遂不作
一字惟深察吾兄近詩益工孟德有言老而能
學惟吾與袁伯業此事不獨今人不能古人亦
自少也未拜命間頻示數字慰此牢落餘惟萬
萬爲時自重不宜

十七

某啓寄貺蘇梨猫笋五味煎榴棗等北方珍奇
物意兩重感佩無窮某近來眠食頗佳痔疾亦
漸去矣兄去此後恐寓行衙亦非久安之計意
欲結茆水東山但未有佳處當徐擇爾姪孫旣
喪母當令長子邁來此指射差遣因挈小兒子
房來次子迨且令試法赴舉也恐欲知之今有
一書與邁取已作兄封題乞令本司邸吏分明
付之邁必已到都下也不罪不罪

十八

某啓本州黃燾推官實甚廉幹郡中殊賴之不
知今歲舉削能及之否孤進無緣自達不免僭
言不罪不罪博羅正月一日夜忽失火一邑皆
爲灰燼公私蕩然林令在式假高簿權縣颶風

東坡二女 卷一
猛烈人力不加衆所知也百姓千人皆露宿沙灘可知葢屋固未能茆竹皆不可一壺千金之時黃燾擘劃得竹三萬竿往濟之極可佳火後事極多林令有心力可委他在式假自不當坐此願兄專牒此子令修復公宇倉庫之類及存撫被災之民彈壓寇賊則小民受賜矣又起造物料若不依實價和買而行科配則害民又甚於火矣願兄嚴切約束本州或更關牒漕司依實支破或專委黃推官提舉點檢催促及覺察科配幸恕僭易黃燾有一申狀爲催促廣州檢

曇穎公案附來人去此文字葢廣州不應副非本官拖延也至孝通直蒙惠書極於感慰深欲裁荅爲連寫數書燈下目昏容後信也不罪不罪六郎亦蒙問及不殊此意惟千萬節哀自重幸恕簡略

十九

正輔要墨竹固不惜爲近年不畫筆生往往畫不成候有佳者當寄上也

二十

某啓近因人來附狀必達比日伏惟尊體佳勝

眷聚各康寧某凡百如昨北徙已絕望作久計
矣寶月師孫法舟來子由有書并劉朝奉書今
附舟去寶月已化矣舟甚佳士語論通貫可喜
可喜開歲忽將一月瞻奉無時臨書惘惘兄北
歸別得近耗否惟萬萬自重冗中奉啓不宜

二十一

某啓近鄉僧法舟行奉狀必達惠州急足還辱
手教且審起居佳勝感慰交集寵示詩域醉鄉
二首格力益清茂深欲繼作不惟高韻難攀又
子由及諸相識皆有書痛戒作詩有說不其言
欲詳言

甚切不可不遵用空被來貺但慙汗而已兄欲
寫陶體詩不敢奉違故寫在揚州日二十首寄
上亦乞不示人也未由會合日聽名音而已餘
惟萬萬若時自重

二十二

某啓承服溫胃藥舊疾失去伏惟慶慰反復尋
究此至言也拙恙亦當服溫平行氣藥爾德孺
書信已領尚未聞所授豈到闕當留乎兄亦歸
覲爾何用更求外補惠及佳麪感忤適有河源
乾菌少許并香篆一枚頗大謾納去作笑有肉

菴蓉因寄示少許無卽已也侯晉叔實佳士頗有文采氣節恐兄不久歸闕此人疑不當遺也故略爲記之不罪不罪

二十三

少懇冒聞向所見海會長老甚不易得院子亦漸興葺已建法堂甚宏壯某亦助三十緡足今起寢堂歲終當完備也院旁有一陂詰曲羣山間長一里有餘意欲買此陂屬百姓見欲數十千可得稍加葺築作一放生池囊中已竭輒欲緣化老兄及子由齊出十五千足某亦竭力共成此事可活

鱗介歲有數萬矣老人沒用處猶欲作少有爲功德不知兄意如何如可便乞附至不罪不罪

二十四

此中湖魚之利下塘常爲啓閉之所歲終竭澤而取略無脫者今若作放生池但牢築下塘永不開口水漲溢卽聽其自在出入則所活不貲矣

二十五

某啓往還接奉其樂無量旣別甚悽斷亦不可言也旦夕到廣想不留兩日尊候必佳健十郎

東坡二刻 卷七
侍行不易六郎甚渴一見也某到家無恙乞不
賜念惟萬萬爲時自重不宣

二十六

某別時飲過數日病酒昏昏如夢中也且速發
此書不周謹恕家釀嘗之微酸不敢寄去二
詩以發一笑幸讀訖便毀之也

二十七

某啓老兄留意浮橋事公私蒙利未易遽數本
州申漕司乞支阜民監買糞土錢若蒙支與則
鄧道士者可以力募緣成之矣告與一言某不
當僭管但目見冬有覆溺之憂太守見禱故不
忍默也但鄧君肯管其工必堅久也不罪不罪
仍乞密之勿云出於老弟也

二十八

某前日畱博羅一日再見鄧道士所聞別無異
者方欲邀來郡中款問也續寄丹砂已領感愧
之極某於大丹未明了直欲以此砂試煮煉萬
一伏火亦恐成藥爾成否當續布聞領得七哥
書遞中已附謝也六郎十郎各計安未及別書
所要書字墨竹固不惜徐寄去也外曾祖遺事

錄呈不一不一

二十九

某近因宜興回人卓契順者奉狀想達視覽卽
日起居住勝老嫂諸姪各計康靖某與幼子亦
如昨遷居已八日坐享安便知愧知愧非兄巨
庇何以得此未由面謝臨紙悵仰乍暄萬萬爲
國自重不宣

三十

某啓本州近申乞支阜民監糞土錢用修橋未
蒙指揮告與漕使一言此橋不成公私皆病敢
望留意近又體問得一事本州諸軍多闕營房
多二人共一間極不聊生其餘卽散居市井間
賃屋而已不惟費耗軍人因此窘急作過又本
都無緣部轄靡所不爲公私之害可勝言哉某
得罪居此豈敢僭管官事但此事俗吏所忽莫
教生出一事卽悔無及也兄弟之情不可隱故
具別紙冒聞千萬亮其本心恕罪幸甚此數十
年積弊難以責俗吏非老兄才氣常欲追配古
人卽劣弟亦不輕發也然千萬密之若少漏泄
卽劣弟居此不安矣告老兄作一手書說與二

身城二亥 卷七
漕但只云指使藍生經過廉得或更以一書與
詹守稍假借之令盡力爲妙自兄過此詹亦知
懼勵精也

本州管六頭項兵却一半無營房其間有營房
者皆兩人住一間頗不聊生其餘只在民間賃
屋散住每月出賃房錢百五十至三百其間賃
官屋者卽於月糧錢內刻非官中指揮蓋掠
房錢者自擅如此不

惟軍人緣此貧乏又都將上下無繇部轄飲博
踰違急卽逃走作賊民不安居又軍妻緣此犯
姦者衆遠方吏不得人從來如此非今官吏之

過也間得數十年來如此矣約度大略少三百
來間好屋若與擘劃磚瓦官自燒林木亦可下
縣採斫只恐難
爲足用又阜民廢監亦有木植此外官

買足之度三百間瓦屋每間可用三貫省錢不
過千緡此事可了願兄與漕司商量先行文字
下本州作訪聞惠州自來軍人闕少營房多在
民間賃居又廣州泉州信州三處差來客軍各
無營房本州清化一指揮雖有營房一二十間
又每年遭水軍人家累難爲存活深爲不便令
本州知州職官都監子細勘會逐一指揮去處

東坡二刻 卷一
及少營房數目子細畫一開具若干指揮全無
營房見今若干兵士賃屋各具見今賃屋人數
供申及相度未有營房指揮合於何處起造營
房及清化指揮年年遭水合與不合遷移如合
遷移卽今來已廢阜民監地位可與不可遷就
仍約度合用磚瓦材料人工錢數先將本州見
有磚瓦材料豁除外仍更具管下縣分有無可
以採斫材木去處兼見差是何人如何採斫及
相度添置瓦窰差兵匠燒變本州皆荒茅地雖
有主百姓自來不採茅官若日差兵士數十人

專留克燒瓦之用於公私竝無妨害此外只具
合支官中見錢的確數目供申仍於本州應係
諸般錢物內刻支係提轉提舉司錢物具若干
數目供申若似此行遣料得不過支轉運司錢
四五百貫思量此事若不稍處置致稍有意外
之患則於監司諸公豈得爲穩便然此事積弊
久矣非今官吏之過切告吾兄勿恠責此中官
吏萬告萬告如以卑言爲然及漕司商量得行

自須專差一精幹官吏來此與權都監王約者
此子甚勤幹同幹之今且體問得逐營事件如後

東坡二效 卷七
一 本州管澄海兩指揮禁軍皆有營房不外住然皆是廢茅屋常憂火燭亦當爲瓦屋又本營逐年多有水患亦當相度合如何疏理溝瀆或築防令軍人安居

一 清化指揮見管二百三十人只有官屋二十間見有五十五人兵級在外賃屋住及年年遭水及地僻遠並無籬墻不可不遷若遷於廢阜監極爲穩便

一 牢城指揮見管二百六十人只有官屋四十間二人共一間外有三十六人兵級見賃屋住

一 泉州客軍一百五人並無營房只有官屋三間餘并賃屋住

一 信州客軍九十六人見管營房七間

一 廣州客軍九十人元因岑探反後添差不曾與置營房此等客軍多在知州都監及場務地分窠坐故只於窠坐處宿食以此不肯賃屋居住然體訪得客軍旣無營房纔有病患易得失所是致死損人衆不可不爲動心江海之間寇攘淵藪近日鹽賊幸而皆已獲不

東坡二女 卷七 十四
爾豈細故哉謫居之人只願安貼如惠州兵衛
單寡了無城郭姦盜所窺又若營房不立軍政
墮壞安知無大姦生心乎此孤旅之人所以輒
貢縷言也與指使藍生語覺似了了可令來此
與王約者同幹否不揆僭言非兄莫能容之然
此本乞一詳覽便付火雖二外甥亦勿令見若
人知其自劣弟出大不可不可

三十一

某啓近指使還左右奉書必已聞達比日履茲
炎燠尊體佳勝某蒙庇如昨筠州時得信甚安
暑雨不常蒸燒可厭曲江想少清爽否何時會
合少解馳結尚冀保練姑慰願言因何推官行
奉啓上問不宣

三十二

橋錢必不足用學錢且告老兄留取切告切告
前所問者已得實狀本州必已申去蓋亦只止
是矣

三十三

某啓近苦痔疾逾旬牢落可知今漸安矣不煩
深念荔枝正熟就林恣食亦一快也恨不同嘗

東坡二刻 卷七 十五
六郎十郎昆仲各安知六郎已拜恩命深增慶
忭病倦未及別啓兼十郎要字尚未暇寫不訝
不訝岐下湖北想頻得信

三十四

某啓柯推良吏冠一郡也兄許一紙乞濟其垂
成他雖細滿內太守一削恐以他年及不使若
非兄特達誰復成之某不合僭言實見其有風
力廉幹可惜其去故爲一言也切望切望若非
公論以柯爲可舉某亦不敢頻煩乞恕察

三十五

近釀酒甚醲白而醇美或教入大麥蘖而此中
絕無大麥如昭州有此物因使人爲置數斛不
罪不罪

三十六

某啓違別忽復數月思仰日積遞中辱書伏審
尊體佳勝甚慰馳想示諭碧落洞詩却未寄貺
必封書時忘之也竊望寄示老弟却曾有一詩
今錄呈乞弗示人也惠貺新茶極爲佳品感佩
之至未由會見萬萬爲國自重不宣

三十七

某啓近因柯推行奉狀必達示諭脩橋事問得才元行牒已到本州差官估所費蓋八九千除有不係省諸般錢外猶少四五百千除有不係省諸般外於法當提轉分認見說估得却是的確合用之數若減省即做不成縱成不堅久矣體問是實然老弟以卑見度之恐不能成何者吏暗而孱胥狡而橫若上司應副破許多錢必四六分入公私下頭做成一坐河樓橋也必矣必矣才元必欲成之選一健幹吏令來權簽判專了此事不然且勿應副此錢但令只嚴切指

揮且令牢繫添修竹浮橋也

竹賤易成創新不過二十千一兩月

修一次每次不過費三千惟頻修為要

前日指揮使去時曾拜聞

營房事後來思之亦與此同度官吏必了不得也深不欲言恐誤老兄事故冒言千萬密之與才元言但只作兄意也至懇至懇

三十八

某啓伏暑切惟起居清勝某凡百如昨指使柯推及郡中買藥兵士三次奉狀一一達否十郎遞中書未到新什此篇尤有功咄咄逼鮑謝矣不覺起予故和一詩以致欽歎之意幸勿廣示

人也未由瞻奉萬萬以時保練麾汗不謹

三十九

德孺懿叔近得耗否子由頗得安問云亦有書至凡處達否鄧道士州中住兩月已歸山究其所得亦無他奇但歸根寧極造次顛倒心未嘗離爾此士信能力行又篤信不欺常欲損已濟物發於至誠也知之知之

四十

某啓專人辱書感慰無量比日履茲新涼尊體何如某一向苦痔疾發歇未定殊無聊也所論退閒之樂固終身無厭但道氣未勝宿疾尚纏想亦災數或言冬深當出厄儻爾時勿藥乎何時一迂來旆少解羈困萬萬以時自重不宣

四十一

某啓近因蜀使奉狀必達惠新茶絕品石耳異味感荷之極也扇二十柄書畫殆遍然終不佳病倦少思也遺事更少涼寫納懿叔近得書甚安德孺久不聞耗也令子各計安未及別書小兒荷問及宜興兩兒服闕後欲南來又赦後癡望量移稍北不知可望否凡聞衆議如何有所

聞批示也報言者論壽州配買茶一事已施行
仁聖之意亦可仰測萬一也

四十二

廣倅書報近日颶風異常公私屋倒二千餘間
大木盡拔乾明訶子樹已倒此四百年物也父
老云生平未見此異老兄莫緣此一到南海拊
視爲佳惠人亦望使車一到若早來民受賜多
矣必察此意獄事辱老兄按正遠近心服闇繆
之人亦緣兄免此寃債當沒齒荷戴乃更恨耶
好笑好笑

四十三

某啓昨日附來使上狀必達稍涼起居住佳勝見
嚴推言邑君嘗服藥尋已平愈今想益康健秋
色漸佳惟冀倍加寢膳不宣

四十四

某啓嚴令清約卹民之心必蒙顧遇也有兩事
託面聞幸恕草次

四十五

某啓近奉慰必已達比日悼念之餘起居如宜
吾兄學道久矣必不使無益之悲久留懷抱但

身城二卷七
劣弟未克面論不免懸情惟深察此理寬中強
飯不勝區區再奉手啓布聞不宣

四十六

某啓知己登舟歲巡連州切望不惜數日之勞
一遊羅浮家居悒悒觸物增懷不如且徜徉山
水間散此伊鬱也仍望先令人來約徑去山下
伺候也少事干告此中太守已借數人白直僅
足使令欲更告兄輒借兩人如許卽乞彼中先
減兩白直刦牒州差兩廂軍借使也不罪不罪

四十七

某啓近兩奉狀必相繼塵聞比來切惟尊候康
安閨門之戚想已平遣前云過重九啓行計已
在塗羅浮之遊果如約否不勝顙望餘暑跋涉
惟冀若時自重不宣

四十八

某目見之事恐可以助仁政之萬一故敢僭言
不罪不罪今來秋大熟米賤已傷農矣所納秋
米六萬三千餘石而漕府乃令五萬以上折納
見錢餘納正色雖許下戶取便納錢然納米不
得過五千碩元科之數則取便之說乃空言爾

東坡二少 卷七
嶺南錢荒久矣今年又起納役錢見今質庫皆
閉連車整船載米入城掉臂不顧不知如何了
得賦稅役錢去朝廷新行役法監司宜共將傷
人戶令易爲徵催准條支移折變委轉運司相
視收成豐歉務從民便據此勅意卽是豐則納
米歉則納錢今乃反之豈爲穩便聞范君指揮
非傳同年意也本州詹守極有卹民之意聞說
申乞第二等以下人戶納錢與米並從其便不
拘元科米數此實一州人戶衆願非詹守私意
及非專計會多納米也望兄力賜一言特

從其請及乞提轉共行一條戒約州縣大估米
價以致百姓重困須得依在市見賣實值如牒
到日已估價太高者許依實改正庶幾疲民盡
沾實惠切望兄留意仍密之勿令人知自弟出
也千萬千萬問得本州支米每年不過九千若
五萬全納正色則有積弊之憂若以積滯之故
年年多納錢少納米則農民益困嶺南之大患
也見說廣東諸郡皆患米多支少請兄與諸公商量具此利害
共入一奏乞今後應役人公人庸錢及重法錢
竝一半折米却以見錢還運司則公私皆便免

得稅米積滯年年抑勒人戶多納見錢此大利也但當立條常令提舉提刑司常切覺察轉運司及州縣大估米價及支惡弱米免虧損役人公人則盡善矣

本州申乞椿定第一等丁米二萬九千餘碩並須得納見錢其餘第一等稅米及第二等以下丁稅米共約計三萬四千餘碩任從民便納錢納米近下零碎者多願納錢且以少計之三萬四千碩中必有一萬以上碩納見錢矣與漕司元科數目不大相懸而第二等以下戶皆得任

便不拘元科數目人情必大悅奈何一年役錢及重法等錢共計支一萬三千四百餘貫若一半折支米卽是每年有六千七百貫錢折米米每斛極貴時不過折五十約計折支得一萬三千餘碩也大郎兄弟有來耗未六郎十郎侍下孝履如何不及作書且乞寬節哀思強食自愛宜與一書煩爲入一皮角遞兒子輩開歲前皆入京授差遣此書告爲便發庶速得達也不罪不罪

某啓自聞尊嫂傾背三發慰書矣比日起居何如懷抱漸開否傾仰之至輒有少意不勝私憂過計之心故復發此書必加恕亮餘無異前懇也不宣

五十

某今日伏讀赦書有責降官量移指揮自惟無狀恐可該此恩命庶幾復得生見嶺北江山矣幸甚

又見赦文云訪聞諸路轉運司有折科二稅過重致民間輸納倍費涉於拮据者令提舉司舉

察關提轉先次改正依條折科訖奏此一節非常赦語必是聖主新意主上自躬聽斷以來事從仁恕如孫載不奏災傷衝替廬壽等州罷配買茶之類皆非有司所及乃天衷英發郵民之深意恨遠不盡聞然亦得北方故人書皆云仁聖日躋兼有昭裕二陵德美某雖廢棄曾忝侍從大恩未報死不敢忘此美政不勝踴躍正輔忠愛之深想同此意然惠州近日科折秣米一事正違着此赦文甚可懼也赦文云訪聞折科二稅過重致民間倍費涉於拮据者令覺察改

正今惠州秋田大熟米賤傷農而秋米六萬餘

碩九分二釐以下納人戶賣米衆人皆云今年米實無價若官

中價錢緊急人戶更不敢惜米得錢便賣下稍不過三十文足二斗已上方納

得一斗豈非赦文所謂折科過重使民倍費者

乎謂之倍剋顯見聖意疾之甚矣赦文牘在衢

路讀者已有此詢可不懼乎謹按編赦支移折

變令轉運司相視豐歉務從民便詳此勅意專

務便民豐則納米歉則納錢今乃返之違條甚

矣某切謂提刑提舉司當依赦文檢坐此條改

正施行昨日惠守詹君申轉運司乞指定第一

等丁米二萬九千餘碩納錢其餘第一等以下

稅米及第二等以下米三萬餘碩並從民便任

納米錢詹欲某與兄一言此雖少蘇疲民然亦時已致書具論矣

未依得今來赦勅也如赦勅意第一等人戶豈

可令倍費乎某恃兄洞不避僭易請兄與傅蕭

二公面議共行下一文字云所有今年折科秋

米並只依見在市賣實直估定其第五等人戶

並聽情愿任納錢米更不拘前來元科數目如

此方依得今來赦文外編赦指揮而一路之民

遂少紓也但聞得東路州郡大率米多支少故

運司常有積滯腐敗之憂不可不為之深慮若能權利害之輕重取舍從宜則拘多補少固自有術何至作此違條害民之事乎

昨日書中所陳役人見錢

奏乞一半折米此公私兩利之策也大凡人戶去州縣遠者及下

戶稅米零碎者皆願納錢只為州郡估得價高

大抵官吏皆畏懼上司但加三以上估價滑胥俗吏結為一片靡不如此須是上司痛加約束則此風庶幾或可革也致人戶只願納米今運司既患米

多支少歸於腐敗所損不小即須權此利害不

知估價稍低而常得見錢以救運司闕乏與空

估高價而令人戶只願納米積滯腐敗終為糞

土者得失孰多若能痛加打罵郡中俗吏令中

平估價則人戶必有大半願納錢者豈非運司

大利乎今惠州每年支米不過九千九千之外

累百鉅萬雖未腐敗而無可支遣與糞土何異

若上司人戶必欲納錢又不失高價則須是州

縣盲枷瞎棒以膏血償填縱忍為之奈赦文何

某不避僭易欲兄專為此一到廣州與傅蕭面

議反覆究竟權利害二公皆仁人君子也必商

量得成即願三司連銜入一文字專牒逐州知

通大略云今年秋熟恐米賤傷農所以聽從民

便任納錢米又緣逐州米多支少恐有積滯腐
敗之憂深慮倉專斛級等意欲多納正色用俸
計會司屬及行人等高估估米價令人戶納錢
倍費只願納米致將納多支少積滯腐敗不委
逐官專切覺察須管一依見在市賣中價不得
輒有絲毫加擡仍具結罪保明申上如牒來到
日已曾高估者許改正裁減務令便民訖申其
高估干繫人並與免罪如經逐官保明後却察
探得知依舊高擡大估比見賣值價有加分文
致人戶不願納錢將來積滯官米卽官吏並須
勘奏乞行朝典若蒙採用芻蕘一路生靈受賜
也恃眷知如此率易死罪死罪此事切勿令人
知出不肖之言也切告切告

五十一

某啓近四奉狀必一一達比日起居何似聞東
行已決但未聞離五羊的日故未敢往迎旦夕
聞的耗卽輕舟徑前也區區併俟面道不宣

五十二

某啓羅浮之遊不知先往而後入州耶抑俟回
日也弟惟兄馬首之視無不可者旦日乘舫徑

東坡二刻 卷七 五十三
至泊頭以來也忽忽未能盡意

某啓多日不上問但積馳仰不審比來尊候何似眷聚各佳否德孺懿叔想時有安問某蒙庇粗遣子由亦安秋涼使旆出按否倘又一見何幸如之未間萬冀自重不宣

五十四

某舊苦痔疾蓋二十一年矣今忽大作百藥不効知不能爲甚害然痛楚無聊兩月餘頗亦難當出於無計遂欲休糧以清淨勝之則又未能

遽爾則又不可但擇其近似者斷酒肉斷鹽酪醬菜凡有味物皆斷又斷粳米飯惟食淡麵一味其間更食胡麻茯苓麩少許取飽胡麻黑芝麻是也去皮丸蒸曝白茯苓去皮入少白蜜爲麩雜胡麻食之甚美如此服食已多日氣力不衰而痔漸退久不退轉輔以少氣術其効殆未量也此事極難忍方強力以行之惟患無茯苓不用赤者告兄惟於韶英南雄尋買得十來斤乃足用不足且旋致之亦可以一啣於廣買去此藥時有僞者柳子厚云盡老芋是也若松根

貫之却是茯苓亦有效與茯苓同可用惟乞辨
其偽者頻有干煩實爲老病切要用者敢望留
意幸甚幸甚蜜此中雖有亦多僞如有真者更
求少許旣絕肉五味只啖此麩及淡麩更不消
別藥百病自去此長年之真訣但易知而難行
爾弟發得志願甚堅恐是因災致福也

五十五

某再啓承諭感念至泣下老弟亦免如此蘊結
之懷非一見終不能解也見勸作詩本亦無固
必自懶作爾如此候蟲時鳴自鳴而已何所損

益不必作不必不作也吾兄作一兩篇見寄當
次韻爾兼寄佳釀川芎大濟所用物意兩重增
感激也問所幹亦別無事恐三四月間告求一
兩般家人至筠及常州至時當拜書干扣也

五十六

某近頗好丹藥不惟有意於却老亦欲玩物之
變以自娛也聞曲江諸場亦有老翁須生銀是
也甚貴難得兄試爲體問如可求買得五六兩
爲佳若費力難求卽已非急用也不罪不罪

五十七

東坡二卷
某慰疏言不意變故表嫂壽安縣君遽捐館舍
聞計悲怛感涕並懷切惟恩義深篤追悼割裂
哀痛難堪日月流速奄畢七供感動逾遠奈何
某限以謫居莫緣奔詣弔問愧恨千萬幸冀省
節悲悼強食自重不勝區區謹奉疏慰不次謹
疏

五十八

某啓不謂尊嫂忽罹此旣惟兄四十年恩好所
謂老身長子者此情豈易割捨然萬般追悼於
亾者了無絲毫之益而於身有不貲之憂不卽

拂除譬之露電殆非所望於明哲也謹地不敢
輒捨去無緣面析此理願兄深照痛遣勿留絲
毫胷中也惟有速作佛事升濟幽明此不可不
信也惟速爲妙老弟前年悼亾亦只汲汲於此
事亦不必盡之佛僧拯貧苦尤佳但發爲亾者
意則俯仰之間便貫幽顯也忝至眷必不訝草
次

五十九

某輒附上綾刻絲各一疋用與表嫂齋僧表區
區微意不罪不罪淡麩經月疾不減却稍肉食

東坡二集 卷七
近却頗安天涼災退自然安適茯苓亦不服食也承寄遺并蜜已領極佳近嚴推官者託口陳二事曾道使人寄書畫扇子去必達八十哥化去感念疇昔爲之出涕史嗣立宅表姊二十一縣君亦有事羈寓嶺海邠堪時時聞此知兄已出巡千萬勿憚遠一來遊羅浮弟候聞來耗便去山下奉候表姪必未到且請決意一來恐明年兄必北歸無由來也

六十

遺事已用澄心紙廷珪墨寫成納去尉掾子孫

一句不須出彼自不知也必欲去者摹刻時落之并有江月五首錄呈爲一笑吾儕老矣不宜久鬱時以詩酒自娛爲佳以者俯仰之間知在何方世界而吾方悲戀不已豈非繫風捕影之流哉

六十一

某啓別後因本州使人一次上狀并香積詩必已達尊覽兩辱賜教具審起居佳勝甚慰馳仰某入冬眠食尤佳几席之下澄江碧色鷗鷺翔集魚蝦出沒又足樂者又時走湖上親作新橋

掩骼之事亦有條理皆粗慰人意益優哉游哉聊以卒歲知之免憂樂錢必已請比來數事皆蒙賜左右此邦老穉共荷戴也乍寒萬萬自重

六十二

某啓長至俯邇不獲稱觴祝頌之懷難以言諭比日起居增勝憲掾顧君至辱手書感慰倍常顧君信佳士伯樂之廐固無凡足也老弟凡百如昨但痔疾不免時作自至杜門不見客不看書凡事皆廢但曉夕默作小乘定雖非至道亦且休息平生勞弊且爾少期百日兄憂愛之深故白其詳不須語人也所謂以得爲失者夢幻顛倒類皆如此爾未由瞻奉萬萬若時自重不宣

六十三

某啓蒙惠冠簪甚奇卽日服之但衰朽不稱爾全麪極佳感忤之至岑茶已領杭人送到表忠觀碑背作五大軸輒送上老兄請挂之高堂素壁時一睨之如與老弟相見也附顧君的信封角草不訝不訝升卿之間已荅之矣并白顧其詳

六十四

某啓別來三辱書教眷撫愈重感慰深矣想已達韶起居佳勝桃花源詩再蒙頒賜誦詠能不釋手管字韻拙句特蒙垂和句句奇警謹用降服幸甚幸甚一字雖戲劇亦人所不逮也某凡百如昨十九日遷入行衙再會未期惟望順時爲國自重因蘇州卓行者奉問不宣

六十五

三詩因感微物以寄妙理讀之翛然自失以病未和得愧忤執政小簡中近人之病聽不聽在他兄不可不言也如聞前削監事亦頗行是否寄惠大黃丸等糟薑法魚麥蘖並已捧領感荷感荷

六十六

近得柳仲遠書報妹子小二娘四月十九日有事於定州柳見作定簽也遠地聞此情懷割裂閑報之爾

六十七

某啓聞歸艤到忻喜不自勝辱手教承起居佳適值夜乏人未可前詣新詩輒次韻取笑取笑

前本附納忽忽

六十八

某啓漂泊海上一笑之樂固不易得况義兼親友如公之重者乎但治具過厚慙悚不已經宿尊體佳勝承卽解舟恨不克追餞涉履慎重早還爲望不宣

六十九

河源事上下繆悠而已有一信箴并書欲附至子由處輒以上干然不須專差人但與尋便附達或轉托洪吉間相識達之其中乃是子由生日香合等他是二月二十日生得前此到爲佳也不罪不罪

七十

河南兄弟已歸左右想哀慕之極切希爲親自覓也近有慰疏未暇別紙

七十一

蜜極佳荔枝蒙頒賜謹附謝懇蘇州錢倅差一般家人又借惠力院一行者契順與宜興通問萬里勞人甚愧其意因令附此書或略賜照管幸甚卒子與借請少許甚幸甚幸

廣州多松脂閩甫嘗買用桑皮灰煉得甚精因
話告求數斤仍告正輔與買生者十斤因便寄
示船上硫黃如不難得亦告爲買通明者數斤
欲以合藥散鐵爐燉可作時羅夾子者亦告爲
致一副中樣者三物皆此中無有也不罪

東坡先生尺牘七卷 終

東坡先生尺牘八卷目錄

程全父十二首

程秀才三首

林天和二十四首

馮祖仁十一首

章質夫三首

目錄 終

東坡先生尺牘八卷

瑯琊焦竑批點

江夏黃居中訂正

茂苑許目昌全閱

與程全父

惠州

某啓去歲過治下幸獲接奉別後有闕上問過
沐存記遠辱手教且審起居住佳安感慰兼集長
牋見寵禮意過當非衰老者所宜承當伏讀愧
汗而已未由會見萬萬以時自重不宣

二 惠州

某乏人寫公狀幸恕簡略示諭固合如命但罪
廢閑冷衆所鄙遠決無響應之理近發書多不

答未欲頻瀆也幸矜察愧愧

三

惠州

新詩過蒙寵示格律深妙非淺學所能髣髴歎
誦不已老拙無以答厚意但藏去永以爲好爾
忽忽不謹

四

惠州

某啓新詩幸得熟覽至於欽誦老病廢學無以
少答重意愧忤而已

五

惠州

別紙示喻具曉所是田地間得郡中猶取文字

未了切不可問也感挂意悚息老拙慕道
空能誦楞嚴言語而實無所得見賢者得之便
能發明如此頌語精妙過辱開示感忤不已

六

惠州

令子先輩辱訪及客衆不及款語少事干煩過
河源日告伸意仙尉差一人押木匠作頭王臯
暫到郡外令計料數間屋材惟速爲妙爲家私
紛冗不及書寫千萬勿罪勿罪蔣生斫木亦告
略督之江君訪別本欲作書醉熟手軟不能多
書獨遣此紙而已

東坡二刻
七

惠州

某啓龍眼晚實愈佳時蒙分惠感忤不已錢數封呈煩聒增悚增悚白鶴峰新居成從天俾求數色果木太大則難活小則老人不能待當酌中者又須土礶稍大不傷根者

柑 橘 柚 荔枝 楊梅 枇杷 松 栢

含笑 梔子

謾寫此數品不必皆有仍告書記其東西十二月七日

八

惠州

令子先輩辱書及新詩感慰彌甚筆力益進家
有哲匠矣何復下問乎老病百事皆廢尤倦寫
書故止附此紙爾不別緘也不罪不罪

九

儋耳

某啓別遽逾年海外窮獨人事斷絕莫由通問
船信忽枉教音喜慰不可言仍審起居清安眷
愛各佳某與兒子粗無病但黎蜒襍居無復人
理資養所給求輒無有初至僦官屋數椽近復
遭追逐不免買地結茅僅免露處而囊爲一空
困厄之中亦何所不有置之不足道也聊爲一

笑而已平生交舊豈復夢見懷想清游時誦佳
句以解牢落此萬萬以時自重船回忽忽布謝

十

僖耳

某再啓閣下才氣秀發當爲時用久矣遐荒安
可淹駐想益輔以學以昌其詩乎僕焚筆硯已
五年尚寄味此學隨行有陶淵明集陶寫伊鬱
正賴此爾有新作遞中示數首乃珍惠也山川
風氣能清佳否孰與惠州比此間海氣蒸鬱不
可言引領素秋以日爲歲也寄貺佳酒豈惟海
南所無殆二廣未嘗見也副以糖水精麩等物
一一銘佩非眷存至厚何以得此悚忤之至此
間紙不堪覆甌携來者已竭有便可寄伯枚否
不必甚佳者不罪不罪

十一

僖耳

某啓便舟來辱書問訊旣厚矣又惠近詩一軸
爲賜尤重流轉海外如逃空谷旣無與晤語者
又書籍舉無有惟陶淵明一集柳子厚詩文數
策常置左右目爲二友今又辱來貺清深溫麗
與陶柳真爲三矣此道比來幾熄亦豈有語此
者耶新春伏想起居住佳勝某與小兒亦粗遣困

窮日甚親友皆疎絕矣公獨收卹如舊此古人
所難也感怍不可言惟萬萬以時自愛爲祝船
回奉啓布謝萬一不宣

十二

僭耳

某啓久不得毗陵信如聞淞中去歲不甚熟曾
得家信否彼土出藥否有易致者不拘名物爲
寄少許此間舉無有得者卽爲希奇也間或有
麤藥以授病者入口如神蓋未嘗識爾

與程秀才

凡三帖

某啓去歲僧舍屢會當時不知爲樂今者海外

豈復夢見聚散憂樂如反覆手幸而此身尚健
得來訊喜侍下清安知有愛子之感襁褓泡幻
不須畱戀也僕離惠州後大兒房下亦失一男
孫亦悲愴久之今則已矣此間食無肉病無藥
居無室出無友冬無炭夏無寒泉然亦未易悉
數大率皆無耳惟有一幸無甚瘴也近與小兒
子結茅數椽居之僅庇風雨然勞費亦不貲矣
賴十數學生助工作躬泥水之役愧之不可言
也尚有此身付與造物聽其流轉流行坎止無
不可者故人知之免憂乍熱萬萬自愛不宣

近得吳子野書甚安陸道士竟以疾不起葬於
河源矣前會豈非夢耶僕既病倦不出出亦無
往還者闔門面壁而已新居在軍城南極湫隘
粗有竹樹煙雨濛晦真蜒塢獠洞也惠酒佳絕
舊在惠州以梅醞爲冠此又遠過之牢落中得
一醉之適非小補也

三

儋耳

兒子到此抄得唐書一部又借得前漢欲抄若
了此二書便是窮兒暴富也呵呵老拙亦欲爲
此而目昏心疲不能自苦故樂以此告壯者爾
紙茗佳惠感忭感忭丈丈惠藥米醬薑糖皆已
拜賜矣江君先辱書深欲裁謝連寫數書倦甚
且爲多謝不敏也

與林天和

俱惠州

某啓近辱手書冗中不卽答悚息春寒想體中
佳勝火後凡百勞神勤民之意計不倦也未由
披奉萬萬自重不宣

二

某啓專人辱書具審起居佳勝爲慰春物益妍

東坡二妙 卷八
時復尋賞否想亦以少雨軫懷也未由往見萬
萬若時愛攝不宣

三

某啓多日不奉書思仰之至伏暑尊候何如惠
貺荔子極佳郡中極少得與數客同食甚幸未
由會合萬萬以時自重

四

某啓近數奉書想皆達雨後晴和起居住勝花
木悉佳品又根撥不傷遂成幽居之趣荷雅意
無窮未卽面謝爲媿人還忽忽不宣

五

花木栽佳感留意惠貺鹿肉尤增慚荷某又上

六

某啓昨日辱訪別尤荷厚眷老病龍鍾不果詣
違愧負多矣經夕起居何如果成行未忘已爲
民誰如君者願益進此道譬如農夫不以水旱
而廢穠蓁也外萬萬自重

七

某啓辱教承微恙已平起居輕安甚慰馳仰暑
雨不常官事疲勩攝衛爲艱惟加意節調以時

東坡二妙 卷八
休息爲佳也忽忽不宜

八

某啓近辱過訪病中恨不款奉人來枉手教具
審起居住佳勝至慰旦夕中秋想復佳風月
莫由陪接但增悵仰也乍涼千萬自重

九

某啓從者往還見過皆不款奉愧仰可勝辱書
承起居住佳勝聞還邑以來老穉鼓舞數日調治
想復清暇矣歲暮萬萬自重

十

小兒往循已數月矣賤累閏月可到此新居旦
夕畢工承問及感感領書及惠笋蕨益用愧感
聞相度移邑果否

十一

某啓辱手教伏承起居住佳勝甚慰馳仰承問賤
累正月才到瀨上閏月上旬必到此也考室勞
費乃老業也旦夕遷入未由會面萬萬以時自
重

十二

某啓辱書承起居住佳勝示諭幼累已到城流寓

東坡二效 卷八
中一喜事然老穉紛紛口衆食貧向之孤寂未必不佳也可以一笑蒸鬱未解萬萬自重

十三

骨肉遠至重爲左右費羊麩鱸魚已拜賜矣感
作之至

十四

某啓辱手教承起居住佳勝久以冗率有關馳問
愧念深矣承惠龍眼牙蕉皆郡中所乏感作之
至未由瞻奉萬萬自重

十五

高君一臥遂不救深可傷念其家不失所否瘴
疫橫流僵仆者不可勝計奈何奈何某亦旬浹
之間喪兩女使况味牢落又有此狼狽想聞之
亦爲憮然也

十六

某啓人來辱書且審比日尊候佳勝甚慰所望
加減秧馬曲盡其用非撫字究心何以得此已
具白太守矣乍熱萬萬以時加嗇不宣

十七

某啓人來辱手教且審起居住佳勝吏民畏愛謠

東坡二刻 卷八 九
頌布聞甚慰所望秧馬聊助美政萬一爾何足
云乎承示喻愧悚之至僧磨已成秋涼當往觀
也毒熱萬萬爲民自愛不宣

十八

某啓比日蒸熱體中佳否承惠楊梅感佩之至
聞山薑花欲出錄夢得書去庶致此餽也呵呵
豐樂數木匠請假暫歸多日不至敢煩指揮勾
押送來爲幸

十九

某啓辱書伏承別後起居佳勝甚慰馳仰數夕
月色清絕恨不對酌想亦顧影獨飲而已未卽
披奉萬萬自重不宣

二十

某啓人還奉書必達節候漸涼起居佳否疊煩
願旨感忤交深未緣面謝惟祝若時自重不宣

二十一

某啓秋高氣爽伏計尊候清勝公宇已就想日
有佳思未緣披奉萬萬以時珍嗇不宣

二十二

某啓前日人回裁謝必達比日茲履薄冷起居

東坡二卷
佳否未緣展奉但有翹想尚冀保衛區區之至
不宣

二十三

某啓近奉狀知入山未還卽日想已還治起居
佳否往來衝冒然勝遊計不爲勞也未瞻奉間
更乞若時自重不宣

二十四

某啓昨日江干邂逅未盡所懷來日欲奉屈早
膳庶少款曲闕人不獲躬詣不罪

與馮祖仁

俱北歸

某慰疏言承艱疾退居久矣日月逾邁哀痛理
極未嘗獲陳區區少解思慕萬一實以漂寓窮
荒人事斷絕非敢慢也比辱手疏且審孝履支
持廓然逾遠追慟何及伏冀俯順變禮寬中強
食謹奉啓疏上慰不次

二

某啓蒙示長牋粲然累幅光采下燭衰朽增華
但以未拜告命不敢具啓荅謝感恻不可言喻
老瘁不復疇昔但偶未死耳水道間關寸進更
二十日方至曲江首當詣宇下區區不究乏人

寫大狀不罪手拙簡略不次

三

某啓昨日辱遠迓喜慰難名客散已夜不能造門早來又聞已走松楸未敢上謁領手教媿悚無地至節想惟孝思難堪奈何奈何來晚當往慰不宣

四

節辰蒙惠手邊酒壺仁者之餽謹以薦先感佩不可言也

五

某啓辱手教承晚來起居住勝惠示珠欖頃所未見非獨下視沙糖矣想當一笑忽忽不宣

六

某啓前日辱下顧尚未果走謝悚息不已捧手教承起居住佳勝卑體尚未甚清快坐阻談對爲悵惘也惠示鈔劑獲之喜甚從此衰疾有瘳矣人還不宣

七

某啓辱手教具審尊體佳勝甚慰馳仰拙疾亦漸平矣來日當出詣番燒羊蒙珍惠下逮童稚

矣謹奉啓謝不宣
兩日不果詣見伏計孝履如宜欲告借前日盛
會包子厨人一日告白朝散絕早遣至不罪不
罪家人輩欲遊南山祖仁若無事可能同到彼
閑行否

九

辱回教及蒙以巖硯法醕嘉蔬珍果等爲餉已
捧領訖顧無以當之適苦嗽昏倦裁謝草草

十

昨日奉辭瞻戀殊甚旦來孝履佳否先什輒已
題跋鶴鹿馬三軸迫行不暇題謹同納上祖仁
方在疾更不煩遠出昨所云金山之行可罷也
乍遠保重

十一

某啓辱牋教累幅文義粲然禮意兼重非老朽
所敢當藏之中笥以爲光寵幸甚比日孝履何
如到韶累日疲於人事又苦河魚之疾少留調
理乃行益遠極瞻繫也歲暮更惟節哀自重

與章質夫

黃州

東坡二卷八
某啓承諭慎靜以處憂患非心愛我之深何以
及此謹置之座右也柳花詞妙絕使來者何以
措詞本不敢繼作又思公正柳花飛時出巡按
坐想四子閉門愁斷故寫其意次韻一首寄去
亦告不以示人也七夕詞亦錄呈藥付徐令去
惟細辨覆盆子若不真卽無效前日路旁摘者
此土人爲之挿秧莓三四月花五六月熟其子
酸甜可食當陰乾其子用之今市人賣者乃是
花鴉莓九月熟與本草所說不同不可妄用想
菴子已寄君猷矣

二

黃州

某啓伏承被名移漕六路輿論所期雖未厭滿
而脫屣炎州歸覲闕庭茲可慶也比日啓途之
暇起居住佳勝某謫籍所拘未由攀餞北望旌馭
此懷可知伏冀若時爲國保重而已謹奉手啓
代違不宣

三

惠州

某啓近承手書以侍者化去曲垂開喻感佩深
矣比來皆已忘去凡百粗遣但方營新居費用
百端獨力幹辦尤爲疲勩冬末乃畢工爾時遂

東坡先生尺牘八卷
杜門默坐雖鄰不覲荷公憂愛之深恐欲知其
略也萬一有南來使人爲致人參乾棗數斤朝
夕所須也不罪不罪

東坡先生尺牘八卷終

